

臨沂縣誌
(民國)
三

臨沂縣志卷十一

人物三

列女

邑乘志節烈婦女動輒數百母儀婦職見者寥寥豈以
貴男輕女傳爲習尙非節烈無由自表襮歟抑亦女教
之未修他事無可述歟臨沂帝后王妃聯翩繼起榮矣
間有賢者漆室女殆知愛國者乎王良妻殆能相夫者
乎王凝之妻殆能讀書者乎孝女孝婦時得一二人罕
哉茲首志后妃後仿劉向列女傳之例以賢明貞孝次
焉節烈婦女臚列於後庶使司女子教育者得以覽云

后妃

〔魏〕武宣卞皇后琅邪開陽人文帝母也年二十太祖於譙納爲妾隨太祖至洛及董卓爲亂太祖微服東出袁術傳太祖凶問左右皆欲歸后曰吉凶未可知正使禍至共死何苦太祖聞而善之建安初丁夫人廢遂爲繼室諸子無母者令后養之文帝爲太子左右賀求賞賜后曰王自以丕年大故用爲嗣我但當以免無教導之過爲幸耳亦何爲當重賜遺乎太祖悅二十四年拜爲王后文帝卽位尊曰王太后及踐阼尊曰皇太后明帝卽位尊爲太皇太后太和五年崩合葬高陵弟秉秉子

蘭別有傳蘭孫女爲高貴鄉公皇后蘭弟琳女爲陳留王皇后見魏書

晉愍懷太子妃王氏太尉衍女也字惠風貞婉有志節太子旣廢居於金墉衍請絕婚惠風號哭而歸行路爲之流涕及劉曜陷洛陽以惠風賜其將喬屬屬將妻之惠風拔劍拒屬曰吾太尉公女皇太子妃義不爲逆胡所辱屬遂害之見晉書

安僖王皇后諱神愛臨沂人獻之女也母新安愍公主后以太元二十一年納爲太子妃安帝卽位立爲皇后義熙八年崩葬休平陵見晉書

臨沂縣志

卷一

二

宋孝懿蕭皇后諱文壽蘭陵人孝皇帝繼室義熙七年拜豫章公太夫人高祖爲宋主進號太妃高祖受禪尊爲太后高祖奉太后素謹每旦入朝未嘗稍失時刻少帝卽位加崇太皇太后景平元年崩時年八十一見宋書

孝武文穆王皇后諱憲嫺臨沂人晉丞相導之裔也元嘉二十年拜武陵王妃世祖卽位立爲皇后大明四年率六宮躬桑於西郊廢帝卽位尊爲皇太后其年崩於含章殿見宋書

明恭王皇后諱貞風臨沂人尙書右僕射僧朗女也初

封湘東王妃明帝卽位立爲皇后上嘗宮內大集裸婦人觀之以爲歡笑后獨以扇障面帝怒曰外舍家寒乞今共爲笑樂何獨不視后曰爲樂之事自多豈有姑姊妹聚集而裸婦人形體以爲樂外舍之歡實與此不同帝大怒遣后起及蒼梧王卽位尊爲皇太后見宋書

[齊]文安王皇后諱寶明臨沂人宋吳興太守韶之孫女也爲文惠太子妃無寵太子爲宮人製新麗衣飾而后牀帷陳設故舊永明十一年爲皇太孫太妃鬱林卽位尊爲皇太后見齊書

海陵王王妃名韶明臨沂人宋太常慈女也永明八年

納爲臨汝公夫人鬱林卽位爲新安王妃延興元年爲皇后其年降爲海陵王妃見齊書

和帝王皇后名薺華臨沂人太尉儉孫女也初爲隨王妃中興元年爲皇后帝禪位降爲妃見齊書

〔梁〕太宗簡皇后王氏諱靈賓臨沂人亦儉孫女也幼有淑德叔父暕見之曰吾家女師也初拜晉安王妃後晉皇太子妃太清三年薨於永福省太宗卽位追崇爲皇后諡曰簡見梁書

〔陳〕廢帝王皇后臨沂人梁司空左長史琳之孫女也天嘉元年爲皇太子妃廢帝卽位立爲皇后後降爲臨海

王妃見陳書

唐順宗莊憲王皇后臨沂人琅邪郡公難得孫女也代宗時以良家子選入宮爲才人順宗在藩邸上以后賜之生憲宗帝卽位將立爲后因病革止永貞內禪尊爲太上皇后元和元年上尊號曰皇太后后謹畏深抑於母家無少假貸訓勵內職有古后妃風焉見唐書

賢明

周漆室女者

續漢書郡國志東海郡蘭陵有次室亭劉昭注地道記曰故魯次室邑列女傳漆室

之女或作次室漆次一聲之轉論衡實知潛夫論釋難並作次室

魯漆室邑之女也過

時未適人當穆公時君老太子幼女倚柱而嘯旁人聞

之莫不爲之慘者其鄰人婦從之遊謂曰何嘯之悲也
子欲嫁耶吾爲子求偶漆室女曰嗟乎始吾以子爲有
知今無識也吾豈爲不嫁不樂而悲哉吾憂魯君老太
子幼鄰婦笑曰此乃魯大夫之憂婦人何與焉漆室女
曰不然非子所知也昔晉客舍吾家繫馬園中馬佚馳
走踐吾葵使我終歲不食葵鄰人女奔隨人亡其家倩
吾兄行追之逢霖水出溺流而死令吾終身無兄吾聞
河潤九里漸洳三百步今魯君老悖太子少愚愚僞曰
起夫魯國有患者君臣父子皆被其辱禍及眾庶人獨
安所避乎吾甚憂之予乃曰婦人無與者何哉鄰婦謝

曰子之所慮非妾所及三年魯果亂齊楚攻之魯連有
寇男子戰鬪婦人轉輸不得休息君子曰遠矣漆室女
之思也詩云知我者謂我心憂不知我者謂我何求此
之謂也見劉向列女傳

〔漢〕王良妻大司徒司直王良在位恭儉妻子不入官舍
留蘭陵里中司徒史鮑恢以事到東海過候其家而良
妻布裙曳柴自田中歸恢曰我司徒史也欲見夫人妻
曰卽妾是也恢乃下拜歎息而還

〔晉〕王凝之妻謝氏字道韞晉安西將軍奕之女聰識有
才辯叔父安嘗問毛詩何句最佳道韞稱吉甫作頌四

何安謂有雅人深致又嘗內集雪下安問何所似也安
兄子朗曰散鹽空中差可擬道韞曰未若柳絮因風起
安大悅凝之弟獻之嘗與賓客談論詞理將屈道韞設
青綾步障自蔽申獻之前議客不能屈及遭孫恩之難
凝之被害道韞發居會稽太守劉柳聞其名請與談議
道韞素知柳名乃坐帳中柳造於別榻道韞風韻高邁
敘致清雅柳退而歎曰實傾所未見有濟尼者游於其
家或問之曰王夫人神情散朗故有林下風氣

〔明〕傅氏張希孔妻希孔爲州吏以事監禁當事者欲致
之死氏時饋飲食見夫籲救無門引刃自刎時充東道

梁甫下車聞之遣吏驗視懷中冤狀一紙提希孔訊之
乃得釋

王氏孫洪基繼室原配蕭氏遺一子可盛撫如己出克
有成立氏生二子可番可育俱有令名年八十有司屢
旌之

〔清〕楊氏朱玳妻鄉賢富春第三女于歸後事姑以孝謹
聞康熙七年地震樓傾夫婦共壓梁下尙皆未死冀家
人急救而朱氏孤而富族人利其死皆袖手氏語夫曰
吾不死君不得生死可求救於家君因以喉扼梁而絕
是夜富春果夢女語以故時沂水盛漲挾匏以濟至掘

救女果死面如生夫尙未絕移時方蘇悉述氏相訣語
王氏歷城訓導楊德裕妻夫病焚香祝天割肱和藥夫
病尋愈邑侯及郡紳旌之

貞孝

〔明〕張氏生員張東漸女母疾篤夜焚香籲天願以身代
遂割腓肉置爐內同焚以祈母安母病果愈

王氏王思義女母病親嘗湯藥歷久不懈母死絕粒而
亡郡守州牧爲之建坊題其墓曰孝女墓

房氏沂衛鎮撫房翱之女正德元年氏年十六選入京
習禮三月聞父喪詔命還家獨居終身至七十有七而

終

清李氏李國經女名榮曾割股療其嫡母病

趙氏邑庠生淑頤女許字宋念祖之子三立未嫁而三立歿氏求往守志父母憐而許之既往拜舅姑請曰兒今爲婦祈免定省願賜一樓非四十年不下也乃遍謁親屬登樓服喪既畢縞素獨居語不聞聲足不至戶忽一日下樓邀族人議立兄子豐年爲嗣計樓居恰四十年也壽七十一卒於乾隆三年合葬祖塋奉旨建坊

李氏農人李自新女許字贛榆傳存未嫁存歿氏年十六奔喪往存庶弟四歲喪母氏撫之極勤以勞成疾卒

周氏父孔侯母張氏相繼而亡時年十三弟璧臣尙在襁褓撫之成立終身不嫁

單氏父瑞幼許字趙希漢未嫁而夫亡女聞訃絕粒數日問所欲曰願往侍養孀姑以問姑姑不許女痛不食飲絕而復蘇者再又婉白諸姑始許之往執婦道侍湯藥與姑同寢處俾夫弟就外傳姑歿服闋後爲夫弟完婚未逾年夫妻繼歿女遂長齋兀坐有餘輒施窮獨學使旌之年六十六無疾終人重其義與希漢合葬爲立嗣光緒間入祀貞孝祠同里閭氏女字李劉氏女字田者事與單貞女畧同皆祀貞孝祠

竇氏邳州竇元清女幼字邑人趙連昌未娶連昌歿女
未知越二年轉訂婚他族女始知之絕粒死兩家議合
葬並以兄子峻肅雙祧旌如例

某氏女

失姓氏

幼許字柞城趙某未娶趙以暴疾夭女聞
卽縊以殉鄉里賢之移棺合葬有墓表

張氏許字劉起元年及笄未嫁而夫歿女聞訃終日抑
鬱聞有議婚者絕粒七日至夜投繯死及殮視衣帶上
有劉氏婚書劉聞之迎其櫬合葬焉

孫氏許字團林劉某十七歲未嫁夫病劇氏聞術家言
新婚可以禳病自請往至門夫病已革一謀面間已歿